

BONERIANO

“
Sea bon, i bo lo
ta un persona
solitario...”

BONERIANO

EDITOR:
Bonaire Communication Services N.V.

Djabièrnè 8 Mart 2024

Preis: \$1.25

SOSPECHOSO HOMISIDIO CHELO LEON DILANTI HUES

Desendientenan di Jan Hendrik i Yuya Emerenciana



Riba e potrèt aki, saká ayera, ta mira di robes pa drechi Alejandro (Lan) Emerenciana, meimei pará ta Henri, yu di Lan. Na banda drechi ta Bernardo (Bèrná) Emerenciana. Dia 18 di mart awor Lan lo bai kumpli 94 aña di edat ku Dios ke. Na sèptèmber awor e ta kumpli 73 aña kasá ku Cornelia Hart. E tres personanan aki ta desendientenan di Jan Hendrik i Julia (Yuya) Emerenciana-Maduro. Yuya a bini di Venezuela. El a topa ku Jan Hendrik na Venezuela, área di Aroa, na unda Jan Hendrik a bai traha komo sneiru, konsiendo paña pa mineronan ku tabata traha den minanan di koper.



Un mion di espiese bou menasa pa kantidat di aktividat humano

Balor di biodiversidat pa desaroyo duradero

KRALENDIJK -- Riba Dia Mundial di Bida Salbahe, Nashonnan Uní i e konvenshon CITES, ta enfatisá e importansia di konservashon di naturalesa, den kua Boneiru i Kòrsou tambe ta partisipá. E dia akí ta enfatisá e balor esensial di biodiversidat pa desaroyo sostenibel i bienestar humano. Pero ta enfrentando un krísis di biodiversidat, ku mas di un mion di espiese menasá pa aktividatnan humano, manera destrukshon di habitat, kontaminashon i kambio klimatólogo. Komo biólogo marino, Jeff Sybersma, ta mira e destrukshon di e rifanan di koral pa kontaminashon i kalentamentu di laman, loke ta rekerí akshon. Apesar di leinan lokal riba naturalesa, Kòrsou no tin leinan di implementashon i status di protekshon pa hopi espiese. Dia Mundial di Bida Salbahe di 2024 ta enfoká riba inovashon digital den konservashon, enfatisando ku mester di akshon tur dia kontra ekstinsion i sostenibilidad.

Importansia di naturalesa

Dia 3 di mart tabata Dia Mundial di Bida Salbahe. E dia akí, proklamá pa Nashonnan Uní tempu ku

a adoptá e konvenshon CITES na 2013, ta rekordá nos anualmente e importansia di naturalesa pa nos planeta. E konvenshon CITES, di kua henter Reino ta parti, inkluyendo Boneiru, ta regulá e komersio di mata i animal den peliger di ekstinsion. E ta un di e medionan pa prevení ekstinsion di animal i mata. Tur ser bibu tin un balor intrínseko ku komo ser humano nos mester respetá. Despues di tur kos, ken nos ta pa disidí nan sobrebibensia. Ta presisamente pa e kontribushonnan ekológiko, genético, sientífiko, edukashonal, kultural, rekreativo i estético ku naturalesa ta hasi nos, pasobra e ta un parti esensial di desaroyo sostenibel i ta promové bienestar general di hende, ku ta pone atenshon spesial tur aña na e importansia enorme di naturalesa.

Krísis serio

Desafortunadamente, e mensahe no ta alegre. Nos naturalesa ta pasando den un krísis serio ku ta bira mas pió. Sientífikonan a kalkulá ku mas ku un mion espiese ta den peliger di ekstinsion. Aunke ekstinsion di animal i mata ta un parti natural

di evolushon, espiese ta desaparese i espiese nobo ta surgi, e velosidat ku e espiese ta ekstingí na e momento akí no tin presedente. I hende ta e kousa prinsipal di esaki. E motibu prinsipal ta e eksplotashon inkontrolabel di diferente espiese, yag riba piská i e degradashon i desaparishon di habitat, e habitat di e espiese.

Polushon i kambio di klima tambe ta kontribuí na e ekstinsion di espiese. Un di kada kuater espiese ta menasá den nan sobrebibensia i pa 2100 esei lo a oumentá na sinkuenta porshento. E espiese mas menasá, ta anfibio, 41 porshento, konifero, 34 porshento, ref di koral, 33 porshento, tribon i chuchu, 36 porshento, mamífero, 26 porshento i para, 14 porshento.

Kontaminashon

“Komo biólogo marino ku ta spesialisá den ekologia di e rifanan di koral di Boneiru i Kòrsou, mi wowo ta yena ku lágrima ora mi mira nan mal estado awe. Sientífikamente a demostrá ku kontaminashon di laman, parti di fuentenan terestre, manera deskarga di awa ainda sin tratá i filtrashon di awa supteráneo

kontaminá na laman, tambe e impakto di kalentamentu di laman pa motibu di kambio klimatológiko, ta e kousanan prinsipal di degenerashon di e ref di koral. Nos no por i nos no mester sigui fingi ku nada ta pasando. Nos mester aktua,” segun Sybersma.

E espiese ta disparsé for di mundu na un ritmo alarmante. Ta kalkulá ku kada sinku minüt un espiese ta ekstingí. Algun espiese no a ni ta deskubrí ni deskribí. Nos ta na e rant di katástrofe, pasobra una bes ku e ta bai, un tipo no ta bolbe. Esaki ta klaramente insostenibel i apsolutamente insostenibel.

Implementashon propio

Aunke Kòrsou komo un isla chikitu, no por solushoná e problemanan di mundu, esei no ta nifiká ku nos no mester hasi nada. Nos tin reglanan ku ta protehá naturalesa, manera e ordenansa nashonal di naturalesa ku a adoptá i a drenta na vigor na 1998. Pero ainda falta e leinan di implementashon. Nos tin un lista rudimentario i hopi desaktualisá di animalnan protehá i ningun mata tin un status di protekshon real. Kòrsou no tin parkenan natural regulá legalmente, pero afortunadamente áreanan manera Christoffelpark i Shete Boka i e diferente asina yama sitionan Ramsar, ta

protehá pa maneho aktivo.

Tambe nos ta kita sierto protekshon for di e normanan di tratadonan internashonal i regional ku ta operá den nos hurisdikshon, pero muchu mihó lo ta un legislashon di implementashon propio mas detaye.

Konektando hende i planeta

Kada aña Nahonnan uní ta duna un tema pa Dia Mundial di Bida Salbahe. E tema di e aña akí ta “Konektando hende i e planeta; eksplorando inovashon digital den konservashon di bida silvestre”. Ku e desaroyo rápido di kapasidat digital, mester desaroyá strategianan i rekursionan pa stòp e ekstinsion di espiese ku ta oumentando lihé. Esaki por keda hasi direktamente dor di implementá mihó métodoonan di investigashon ku ta oumentá konosementu di e kousa di e ekstinsion, pero tambe indirektamente dor di programanan ku ta mehorá e sostenibilidad di nos akshonnan, pensa riba e 17 ophetivonan stratégiko di desaroyo, ODS, ku mester logra pa 2030, pero tambe pa kombatí kousa di kambio di klima, manera emishon di CO2 i otro gasnan kontaminá. I no solamente Riba Dia Mundial di Bida Salbahe, sino tur dia.



Pronóstiko di tempu pa Boneiru

Pronóstiko di tempu pa Boneiru
Djaweps 07 te Djabièrnè 08 Mart 2024
Leve te parsialmente nublá i seku

Awe i mañan lo ta leve te parsialmente nublá i lo keda seku. E temperatura máksimo lo ta aproksimadamente 32°C, e temperatura mínimo mas o ménos 27°C. Bientu for di direkshon ost ta moderá te basta fuerte, forsa 4-5.

Altura di ola: 2.0-2.5 m (aproksimadamente 7 pia).
*** Altura di ola válido pa laman grandi**

Peña Traha Pa Bo B.V.

ta buska

-2 metselaar

Pa mas inf. # di telefón

+599 785-3119

Eli Deli Cafe B.V.

ta buska

Barista

-idioma: spaño, ingles i papiamentu.

-min 1 aña di eksperensia, edat min 25 - max 35.

Pa mas info yama telefòn **795-4709**

SOSPECHOSO HOMISIDIO CHELO LEON DILANTI HUES

KRALENDIJK- “Mi ta skucha hopi mentira di nan banda. Nan ta pidi daño i perhuisio, ami awor? Mi tambe ta leshoná. Mi tambe tabata ke hasi denuncia pero polis no a hasi nada” tabata palabranan di Manolo R.S. (42) nasé na Santo Domingo. Ayera, 7 di mart Korte den Promé Instansia a atendé e kaso di homisidio di J.B. Vivas Benitez mihó konosí komo Chelo Leon. Ainda ta fresku den

memoria e kaso lamentabel aki ku básikamente a sakudí Boneiru, spesialmente e komunitat latino. Ministerio Públiko (OM) ta akusá Manolo di 2 echo kastigabel homisidio i maltrato ku un arma di e hòMBER R.A.C.C.

Korte no a atendé e kaso den su contenido, sino pro forma. E huristanan a para ketu na e estado di e investigashon penal. Sala di Korte tabata yen, por a nota

na un banda basta famia i amistad di Chelo Leon. E otro mitar di sala tabata yená ku sostenedónan di e sospechoso.

Abogado Marga Van Lieshout tabata enkargá ku defensa di e sospechoso miéntras fiskal Laura Stroink a representá OM. Mayornan di Chelo Leon a presentá ku abogado Anthony Nicolaas. E famia di e víktima tin intenshon pa entrega petishon pa daño i perhuisio.

E sospechoso ta será den kuadro di aresto preventivo i su abogado no a hasi petishon pa suspendé esaki. “Su señora i su yunan ta sinti su falta. Loke mi kliente ke ta pa hasi un bon investigashon. E no ke pidi suspenshon”, Van Lieshout a bisa. E sospechoso a hasi denuncia di maltrato i hustisia lo atendé esaki na un otro okashon.

Na inisio fiskal a bisa ku por atendé contenido di e kaso riba 20 di yüni próksimo pero despues di konsiderá algun aspekto práktiko hues a posponé e tratamentu indefiní. Sí, e intenshon ta pa atendé e kaso den yüni di e aña aki.

Mester mensioná ku e sospechoso ta insistí di ta inosente. Tambe ku e mes ta víktima di agreshon. Dia di e insidente a dal e ku un stòki, konsekuente el a kore yega hospital i aki el a pèrdè konosementu. Ora el a bin bei polis a detené. E ta ninga di a heridá R.A.C.C. “Mi no tabatin kontakto kuné.”

Investigashon ainda no ta kla


Abogado Van Lieshout tin deseonan pa ku e investigashon. El a pidi pa hasi un investigashon di DNA di e sanger ku a haña den pikòp di e sospechoso. Tambe el a trese dilanti ku vários imágennan di video ku polis a manda p’e no tin zonido. Abogado a pidi pa e haña imágennan di video adishonal di supermerkado Rincon City. Banda di esaki el a pidi rekonstrukshon di e krímen na e sitio di delito. “Ta deskribí ku mi kliente a ranka su mes for di e multitut i a bai riba e víktima. Apesar di tur e deklarashonnan pa mi no ta klaro kiko a sosedé i na unda. Mi no ta mira e kuchú i mi ta puntra mi mes ki

momentu i kon el a yega na e kuchú”, segun e abogado. El a trese e posibilidat dilanti ku e i un otro persona por a kometé e krímen. Fiskal a splika ku ta wardando riba rapòrt di Instituto Forensiko Hulandes (NFI) tokante investigashon di sapatu i paña di e sospechoso. Tambe ku sikiater i sikólogo mester hasi un investigashon konserní personalidat di e sospechoso. Ainda no a bai di akuerdo ku rekonstrukshon di e krímen. Fiskal ta bai traha un liña di tempu i ta añañá e lokalidat di kada suseso. Aki e abogado por mira kua testigu e ke pa hues komisario skucha. Hues ta haña mester ta kouteloso ku rekonstrukshon di e krímen. “Tur klase di emoshon por bin ariba i e situashon ta bira mas konfuso.”

Doloroso

No por deskartá ku e situashon ta sumamente doloroso pa ámbos partido, spesialmente pa famia di Chelo Leon. Hues a tene kuenta ku esaki. “Mi ta pidi OM pa konsultá ku tur partido konserní i wak un otro lokalidat pa nos atendé e kaso den su contenido. Eventualmente nos por bai Marriot pa asina tin espasio pa tur hende interesá, sigui e kaso”, hues a bisa.

Tambe hues a primintí di regla un intérprete pa tradusí pa públiko presente.



Reunion general Piskabon

KRALENDIJK -- ‘slipway’ i wafnan. Piskabon kier invitá su miembronan na un reunion general segun statuto. Durante esaki lo presentá relato anual, relato finansiero i alabes hasi algun palabrashon sumamente importante.

Tambe lo atendé tópikonan manera e buinan, e problemátika di Ta spera ku tur miembro por traha tempu dia 10 di mart awor, pa bin skucha, dialogá i interkambiá pensamentu na bienestar di peskeria. E reunion ta djadumingu 10 di mart di 18:00 pa 20:00 na Fundashon Antriol Avanti, Burak’i Yonchi.

Eli Deli Cafe B.V.

ta buska

Banket bakker 40 ora pa siman

-idioma: spaño, ingles i papiamentu.

-min 2 aña di eksperensia, edat min 25 - max 35.

Pa mas info yama telefòn **795-4709**



TA BUSKA DOUANE DECLARANT

- mester tin eskperensia

- mester por dominá programa di

Asycuda - Quickbooks - Microsoft Office

Mail bo VC na: **geermank@yahoo.com**

Ta ofresé:

Bon salario a base di eksperensia i benefisio sekundario.

POLÍTICA

Kontra manifestantenan pro Palestino

Presidente Parlamento ta bai hasi denuncia

KRALENDIJK/DEN HAAG – Presidente di Tweede Kamer ta bai hasi denuncia kontra manifestantenan ku a tuma medida na fabor di e palestinonan na e frontera di Gaza den e sala di resepsion di Parlamento. Un 25 manifestante a sinta djaluna den sala di Parlamento i tabata pankartanan manera 'Palestina liber' i 'Rutte sanger den bo man'.

Polis a saka e manifestantenan afó di

e sala. Anteriormente e manifestantenan a stroba e ora di pregunta.

Presidente di Parlamento Bosma, a kalifiká e akshon di e manifestantenan komo ekstremadamente lamentabel i sensurabel i a hasi denuncia. Tambe el a bisa ku kualkier persona ku a komportá malu ta haña prohibishon. Bosma ke papia ku su kompañeronan di Parlamento tokante sí mester oumentá e medidanan di siguridat den

e sala:

“Mi ta alehá fuertemente for di kualke persona ku hasi esaki di un manera òf otro, purba papia bon,, òf bisa ku e manifestantenan tin rason. E violadónan di lei no tin esei den ningun manera.”

E gran mayoria di Parlamentario tambe ta hopi kritiko di e akshon di e manifestantenan den e edifisio di Parlamento.

(Fuente: NOS)



Na opinion di Beukenboom:

Mester kita grifir for di trabou

KRALENDIJK – E komportashon ònbeskòp di e actual grifir di Konseho Insular ta duna tur motibu pa retir'é for di e funshon aki.

Ta opinion bosiferá e siman aki pa lider di e partido FSP Robby Beukenboom den un entrevista na Radio Live99. “Arien de Wolf, grifir interino di Konseho Insular, ku arogansia ta rebaha e hendenan di Saba bisa ku famia ku famianan ta drumi ku otro i traha yu.”

E figura di De Wolf mas i mas ta birando un persona dòrná pa kontroversialidat den komunidat boneriano. Beukenboom tabata skèrpi i dirèkt den e entrevista radial: “Abo no por bisa

e kos ei, pió bisa e kos ei públikamente, foral si bo ta un hulandes oropeo. Niun frakshon no a bin ku un moshon kontra dje. Pa algu asina mester kit'é for di trabou.”



Tokante WolBES i FinBES

MPB tin problema ku proseso di preparashon pa deliberashon

KRALENDIJK -- MPB tambe tin Movementu di Pueblo Boneriano (MPB), pa medio di su lider di frakshon, Junny Wout, a komuniká ku nan tin opheshon kontra e manera ku e proseso pa a prepará pa deliberashonnan ku Hulanda tokante adaptashonnan na WolBES i FinBES, a kana.

E dokumentu akí a keda prepará sin envolvimentu di e poblashon. Pa motibu di esaki, pueblo no tabatin e oportunidat pa ekspresá nan opinion, asina Wout a bisa.

reservashon tokante kiko nan deskribí komo e agènda tras di e dokumentu. E partido tabatin miedu ku e agènda di Konseho Insular ta pa trese sierto kambio den struktura estatal di Boneiru, lokual segun MPB, nunca tabata e meta di e diskushonnan tokante e dos leinan. Segun Wout, e falta di transparensia den e proseso di preparashon, ta un oportunidat pèrdí pa un debate habrí i transparente tokante e rumbo deseá pa e isla.



Nina den Heyer a bira 'Serafina den djèt'

Diputado i famia ta gosa den hotèl di 5 strea na Hulanda

KRALENDIJK – “Ki ehèmpel bo ta duna ora bo ta realisá un biahe di trabou pa Hulanda ku un delegashon hopi pisá asina. Diputado Abraham tin kasi 1 luna na tera friu. Den mi karera komo polítiko nunca a mira un kos asina. Nan a biaha business class i tin 200 dòler pa gasta tur dia.”. Esaki lider di FSP (Frente Sosial Progresivo) Robby Beukenboom a deklará na radio e siman aki.

Segun Beukenboom, mas riba dje, diputado Abraham ta keda ku señora i yu den Hotel Hilton di 5

strea. “Mi no tin bèrgwensa pa bisa, ta pueblo ta paga. Nunca bisto. Kos ku ta pasando awor. Kuater siman riba e fiesta aki.”

Beukenboom ta sigui splika: “Nina den Heyer ta simplemente un Serafina den djèt. E diputado aki tabata pidi pa no bula den ‘business class’ pa asina baha gastu. E mesun Nina aki, ta bai bin Boneiru, Hulanda, Kòrsou, manera hende ta bula den DiviDivi Air, ku nos ta bai bini den dje Kòrsou-Boneiru. Esei pa baha gastu? Boso sintí no por ta bon!”

Eli Deli Cafe B.V.

ta buska

KOK 40 ora pa siman

-idioma: spaño, ingles i papiamentu.
-min 2 aña di eksperensia, edat min 25 - max 35.

Pa mas info yama telefòn **795-4709**

POLÍTICA

Van Huffelen no por traga oumento kompensashon miembranan di Konseho Insular

Kombersashon penetrante

KRALENDIJK – Frakshonnan di Konseho Insular di Boneiru a reakshoná repartí riba e kombersashon ku Sekretario di Estado, Alexandra van Huffelen, tokante e kontroversial oumento di kompensashon di frakshon.

E konklushon di e mandatario ta, ku Konseho Insular no a demostrá su mes prepará pa reevaluá e regulashon i no ta kompartí dor di tur e partidonan. Dossier Koninkrijkrelaties ta publiká e loke awor parse ta ku e miembranan di Konseho Insular durante e konferensia di trabou tokante e revishon di WolBES, van Huffelen a drenta kombersashon ku kada frakshon apart tokante e oumento di e kompensashon di fakshon di 245 mil pa 795 mil dòler.

Van Huffelen a duna e representantenan di pueblo di Boneiru bon kla di konosé ku e no por splika Tweede Kamer tokante esaki. E chèns ta grandi ku Parlamentarionan otro luna ta bai hasi pregunta krikto tokante e mas di 88 mil dòler pa asiento di Konseho Insular, di e regulashon briante di kompensashon di frakshon di henter Hulanda.



Penetrante

“E tabata un kombersashon penetrante,” e sekretario di estado ta laga sa, via su boseru. “A palabrá ku den e afspraknan hasí tokante e sosten di Konseho Insular, lo bolbe bai wak riba e kompensashon di frakshon.”

E referensia na e afspraknan tokante e sosten di Konseho Insular ta kai riba e 350 mil euro ku tin menshoná den e diseño di e lei di revishon di WolBES. E primintimentu ya tabata serka Konseho Insular di Boneiru konosí tempu ku a disidí di oumentá e propio kompensashon ku 550 mil dòler èkstra.

Pidí pa un reakshon, miembro di Konseho Insular, Cyrill Vrolijk, di Frakshon Vrolijk, ta bisa ku e no tin noshon pa e punto di bista di van Huffelen, ku e no por splika e oumento na Tweede Kamer.

“Di mi parti e

kompensashon por bai bèk na e regulashon anterior di 52 mil dòler pa frakshon.”

Humprey Wout di MPB ya anteriormente a boga pa drai bèk e desishon kontroversial akí. “E sekretario di estado a hala nos orea. Esaki Konseho Insular por a evitá sí e otro frakshonnan mesora e sostené mi proposishon pa rekonsiderá e desishon. E tempu ei ya mi a pidi pa un konstrukshon finansiero bon, pasobra tabatin falta di esaki.”

Kèlder

Kaminda Vrolijk ta bisa di a eksperensia e kombersashon ku van Huffelen komo positivo, Daisy Coffie di M21, ta mira bèk kompletamente otro: “Sí e sekretario di estado tabata deseá un kombersashon, ta normal mirando e beheit inhuustu tokante e tema akí den prensa.

Nos tabatin un invitashon sperá na e ministerio, òf den un sala di reunion di un hotèl, kaminda e konferensia di trabou a tuma lugá. Pero na komienso di e di dos dia di e reunion, e sekretario di estado tabata deseá un suspenshon

pa mesora, awor dirèkt, konsultá ku e delegashon di Boneiru.”

“A hiba nos den un kèlder sin bentana. Na mi bista lo tabata mas nèchi i étiko pa informá nos por lo ménos e dia promé ku promé di inisio di e segundo dia di e konferensia, ku lo tabatin un kombersashon ku e sekretario di estado,” segun Coffie, kende a agregá ku el a ekspresá su malkontentu tokante e asuntu na direktor di relashon di Reino pa Karibe Hulandes, René Baghus i direktor general di relashon di Reino, Roald Lapperre.

Éksito grandi

“Mas aleu e kombersashon a kana normal. E sekretario di estado a ekspresá su preokupashon i naturalmente nos tin komprendementu pa esaki. Sí bo no ta disponé di e informashon korekto, semper ta difísil pa splika na ken ku por ta.

Esaki ta konta pa tur hende, no solamente pa e sekretario di estado. Nos a splika un ke otro den e deseo ku el a komprondé nos. Na regreso na kas, mi ta dispuesto pa huntu ku mi koleganan pa konsiderá pa manda un karta ofisial ku tur e splikashonnan duná bokal i ofresé ainda un splikashon por eskrito na e sekretario di estado,” segun Coffie.

Otro ku Vrolijk i Wout, Coffie no ta dispuesto pa habrí bèk e debate tokante e oumento di e kompensashon di frakshon, di kua e ta

tuma tambe distansia di e afsprak ku, segun van Huffelen, lo a hasi: “Durante e tratamentu di e aseptashon di e ordenansa menshoná, a disidí ku na desèmber 2024 ainda lo evaluá esaki i sí ta nesesario, hasi adaptashon.

Mi ta hopi kontentu ku e konferensia a bira un éksito grandi. E kombersashon ku e sekretario di estado den e kèlder no ta komparabel ku nos resultado lográ.”

Den mal tera

Lidernan di frakshon Rolanda Makaai di Partido Demokrat i Benito Dirksz di UPB, a keda sin kontestá preguntanan di Dossier Koninkrijkrelaties. Pa nan frakshon, e regulashon nobo ta toka e mas beneficiario, na lugá di 60 mil dòler, nan ta strika desde awor ku 265 mil dòler anual.

E desishon pa esaki a pasa ketu ketu na òktober, sin konsulta di konseho den e reunion di formashon di desishon di Konseho Insular. Momentu ku e oumento ainda a lèk, algun frakshon a indiká ku esaki ta nesesario, pasobra e kompensashon di miembranan di Konseho Insular ta hopi abou.

Serka Sekretario di Estado van Huffelen, e desishon a kai den mal tera, pa medio den e lus di e pobresa grandi na Boneiru.

E tempu ei el a laga sa ku e ta spera ku Konseho Insular for di su mes, ke revisá e desishon.

Automobil Express

ta buska

-2 elektro-mekaniko

Pa mas inf. # di telefón

700-8725

Boneiru a risibí 17.218 bishitante den luna di febrüari

KRALENDIJK – Boneiru ta anunsiá un logro históriko: for di e resultadonan preliminar ta resultá ku na luna di febrüari 2024 nos isla a yama bon biní na 17.218 bishitante stayover. Pa komparashon: na luna di febrüari di aña 2023 e kantidat total di bishitante tabata 16.136 i na luna di febrüari di aña 2019 esaki tabata 13.700, loke ta nifiká un tendensia

positivo den Boneiru su trayektorio turístiko. Esaki ta un oumento di mas òf ménos 6,7% for di aña 2023 pa aña 2024 i un kresementu supstansial di mas òf ménos 25% for di aña 2019 te aña 2024. E bishitantenan hulandes a keda e grupo di mas grandi ku 44% di e total, sigui pa e merikanonan ku 28,5%. Kòrsou, Canada, Alemanian i Aruba a kontribuí den

un forma konsiderabel na Boneiru su sektor turístiko.

Na aña 2024 Boneiru a konosé un oumento remarkabel di 22% pa loke ta trata bishitantenan merikano kompará ku e aña anterior, i un oumento supstansial di 81% pa loke ta trata bishitantenan kanades. No opstante e tendensianan akí ku generalmente ta positivo, tabatin un bahada leve di e kantidat


di bishitante hulandes di 7923 na aña 2023 pa 7696 na aña 2024, loke ta nifiká un bahada di mas òf ménos 2,86%. E bahada akí ta un konsekuensia di e bahada den e kantidat di buelo i asiento disponibel riba eruta di Amsterdam pa Boneiru komo konsekuensia di un kambio di e avionnan ku nos partnernan di aviashon hulandes ta usa, i den e kantidat di ruta programá ku nan ta bula.

Ebishitantenanmerikano a bini prinsipalmente for di New York, Florida, Pennsylvania, California i otro estadonan grandi. E gruponan di edat ku representashon mas haltu tabata esun di 55 pa 64 aña (26,2%) i esun di 65 aña

bai ariba (24%), loke ta un indikashon di e interes fuerte serka biaheronan di edat un tiki mas haltu. E bishitantenan hulandes a bini prinsipalmente for di Noord-Holland, Zuid-Holland i Noord-Brabant, kaminda e gruponan di edat di 55 te 64 aña (22%) i di 54 te 59 aña (19%) a dominá.

Mas aleu na luna di yanüari 2024 Boneiru a yama bon biní na 54.446 bishitante krusero riba 24 barku krusero.

Pa estadística i informashon mas detayá tokante Boneiru su prestashonnan turístiko, bo por bishitá nos wèpsait riba www.bonaireisland.com òf manda un email na info@bonaireisland.com



Den avion ku destinashon Amsterdam

Polis Surinameño ta haña 600 kilo di kokaina

KRALENDIJK / SURNAM -- Polis di Suriname Airways ku tabata bayendo Amsterdam. E droga tabata den 17 kaha di kokaina den un avion ku tabata skondí den un

espasio na e parti abou di e avion, segun un unidat spesial di droga di Polis.

E téknikonan di Surinam Airways a risibí un reportahe di un iregularidat den e avion i a bai investigá. Despues ku a haña e droga, a yama e ekipo internashonal di kombate kontra droga di Polis, BID Team.

E avion a keda atrasá pa oranan largu debí na e deskubrimentu di droga, pero finalmente a despegá for di Aeropuerto Internashonal di Surinam.

Algun dia pasá, Hulanda i Sürnam a anunsiá ku nan ke kuminsá ataká kontrabanda di droga huntu. E funshonarionan di Duana di e dos paisnan, lo asistí huntu na kursonan di entrenamentu i interkambiá informashon tokante métodoonan di kontrabanda.

Hulanda a interseptá 523 kilo di droga for di Sürnam aña pasá. Un aña promé, e tabata pesa 1187 kilo.



Caribbean JA Building & Co. N.V.

ta buska

**-Metselaar - Electrotechnicus
-Loodgieter -Timmerman -**

inf. telefón **+599-777-9488/777-6939**

Partisipashon



Preis pa produktonan di kombustibel entrante **08/03/24**

PREIS POR MAYOR

Gasolin	\$ 135.83	USD ct pa liter
Kerosin	\$ 100.00	USD ct pa liter
Gasòil	\$ 102.47	USD ct pa liter
LPG 100 lbs	\$ 51.42	USD pa silinder
LPG 20 lbs	\$ 10.64	USD pa silinder

PREIS POR DETAYISTA

Gasolin	\$ 144.00	USD ct pa liter
Kerosin	\$ 103.00	USD ct pa liter
Gasòil	\$ 110.00	USD ct pa liter
LPG 100 lbs	\$ 57.50	USD pa silinder
LPG 20 lbs	\$ 12.00	USD pa silinder

Gezaghebber
R.A. Oleana

Sekretario Insular
mr. C.J.L. Frans



Outo ta basha kurá i pal'i lus abou

KRALENDIJK – di un aksidente serio ku a tuma lugá riba Kaminda Djabou. Na yegada di patrúyá na e sitio, a bin topa ku un vehíkulo ku a dal den kurá di un kas bashando esaki abou i tambe kibra un palu


di lus ku a bin kai riba e vehíkulo.

Mesora a pidi Sentral pa dirigí bomberonan i tambe ambulans ku urgensia pa e sitio ku na su yegada e paramedikonan mesora a duna e víktima e promé asistencia, pa despues transport'é ku urgensia pa hospital pa tratamentu médiko avansá.

Personal di WEB tambe a presentá na e sitio pa atendé ku e palu di lus i tambe pipa di awa ku a keda kibra.

Kiko tabata e kousa eksakto di e aksidente no ta konosí. Na e sitio por a skucha ku aparentemente ta trata di un kaso di hit & run.

(Fuente / Foto: LIVE99.9FM)



MUHÉ, TIN UN KU TA REGOSIHÁ DEN BO!

SEÑOR bo Dios ta meimei di bo, un guerero viktوريوس. E lo regosihá den bo ku alegría, E lo ta ketu den Su amor, E lo regosihá den bo ku gritu di alegría." Sofonias 3:17(BS)

Mi a hala un rosea grandi i pisá; ki dia situashon ta drecha; kiko mi ta hasiendo robes; ningun hende ta mira ni ta kontentu ku mi. Kisas bo tambe ta identifika bo mes ku e gritunan akí? Awe mi ke bisa bo ku tin Unu ku no ta mira so, ma tambe ta regosihá den bo ku alegría. E ta biba den bo kurason; E ta bo Guerero Viktorioso!

Na momento ku nos asepta Hesus komo nos Único i Suficiente Salvador; E ta bira tur tur kos pa nos. Pasobra El a pordoná nos pikánan i kita nos kastigu; awor nos tin speransa di bida eterno den djE. Nos ta salvá, skohí, stimá, bendishoná, apartá. Situashon por ta difísil, nos no tin e 'all put together' manera nan ta bisa; ma un kos ta sigur: Un dia pronto nos lo ta liber i gosando pa eternidat.

Miéntras tantu laga nos rekordá bon ken nos ta den Kristu Hesus. Pesei, si un hende ta den Cristo, ta un kriatura nobo e ta; e kosnan bieu a pasa kaba; ata, tur kos a bira nobo. 2 Korintionan 5:17. Nos ta kriaturanan nobo den Kristu i tur kosnan bieu i di ántes a keda patras, nos ta pordoná pa medio di e sanger di Hesus. No laga nos mente gaña nos ku pensamentu inkorekto i mentira. E mente no por definí ken nos ta; ta Señor so ta definí ken kada persona ta. Awe riba e dia spesial di Hende Muhé akí, lanta i regosihá den Señor Hesus.

Bo tin SEÑOR Dios komo bo Guerero Viktorioso kaba?

Gilda Beukenboom-Sintjago
Produkshon PGM

Programanan di Bonaire.tv

TELBO kanal 70

Flamingo TV kanal 23

Djabièrnè 8 Mart 2024

12.00 Herensia:	Nos Kosecha
13.00 Aki Boneiru:	Raymunda Martis4
14.00 Herensia:	Bernard Ben Laken
15.00 BAPA:	Feliciano Da Silva Piloto i Vita Frans
16.00 Aktualidat:	Suzy Thodé
17.00 Aki Boneiru:	Segni Bernardina
18.00 Herensia:	Museo Kanta Orkidia (Dolfi & Chemi)
19.00 BAPA:	Ria - Rosemarie Heitkonig
20.00 Herensia:	Vivienno (Vi) Lindy Frank 2
21.00 Aki Aruba:	Atan Lee (Museo)
22.00 Herensia:	Martins Cecilia
23.00 BAPA:	Josella Chula Martinez

BIDA SALÚ

Un malesa ménos konosí ku ta afektá prinsipalmente mucha

KRALENDIJK – Un malesa di komentu ménos konosí ku por ehèmpel ‘anorexia’ òf ‘boulimia’. Tòg segun kalkulashon, un tres porshento asina di mucha Hulandes i un porshento di adulto tambe tin problema ku e malesa akí ‘Avoidant/Restrictive Food Intake Disorder’ (ARFID). E malesa akí ta e aña akí sentral den e siman di konsientisashon di komentu ku ta kaba e siman akí.

Serka ARFID, hende tin un miedu irashonal di kome sierto kuminda, por ehèmpel pasobra nan tin miedu di saka òf choka, òf evitá kuminda ku un sierto tekstura. E malesa a riba rekonosí internashonalmente desde 2013, pero ainda ta relativamente desconosí, segun Eric Dumont, hefe di tratamentu di SeysCentra, un sentro di spesialisashon pa mucha ku problema alimentisio. Ainda tin masha tiki konosementu entre e dòkternan di kas i den e mundu di hospital tokante ARFID. Ta falta hopi pa e muchanan bin serka nos.

Dumont ta kere ku ta importante pa rekonosé e malesa mas tempran. Pasobra sí muchanan òf adulto no ta risibí tratamentu pa esaki, ta

hopi probabel ku nan tin problema pa kome. I sí e sigui kome selektivamente, e lo tin problema tambe pa falta di vitamina i nutriente.

Sandra Mulkens, profesor special di nutrishon i malesa di kuminda na Universidat di Maastricht, tambe ta kere ku ARFID mester a establesé su mes promé. Pa su nombramentu komo profesora na 2018, el a purba di oumentá i konsiensia di ARFID. “Mi mes, pero tambe kolega di SeysCentra, kolega di Universidat i kolega for di eksterior, nos a investigá hopi i a kapasitá hopi hende. I den e enfoke di e kadena nashonal pa malesa di kome, ku ta finansiá pa e ministerio di salú, ta un tema kayente.”

Ademas, den e último añanan a desaroyá kursonan elektróniko i seminarionan riba WEB ku ta yuda dòkternan rekonosé ARFID. Pero e konosementu mester mehorá, Mulkens ta bisa. E ta tuma un tempu relativamente largu promé ku ta usa konosementu nobo den práktika.

ARFID i outismo

Na e momentu akí, SeysCentra ta e úniko sentro di spesialidat na Hulanda den e área di ARFID. Aki ta trata di muchanan for di henter e pais i e lista di

espera ta largu, Dumont ta bisa. Na Utrecht, e tempu di warda ta oumentá na dos aña.

Pero no tur ku ta yega aki ta realmente tin ARFID. Tin biá un malesa di kome tin un otro fondo, Dumont ta bisa. Na Seys nos tin un instrumento di medida ku ta yuda ku e diagnóstiko.

Ta sorprendente ku muchanan ku outismo tin mas chèns di tin ARFID ku muchanan sin outismo. Na Seys, un kuart di e muchanan ku ta den tratamentu, tambe tin outismo.

Eliminá menasa

Si un persona ta haña ku e tin ARFID, e tratamentu ta kuminsá ku yudansa di dietista, pediatra i sikólogo. Den e kurason di e tratamentu, segun Dumont, tin terapia di komportashon. E meta ta pa eliminá e menasa di nutrishon.

Pahasesaki, e especialista ta traha ku e asina yamá seshonnan di kuminda, pero tambe ta diskutí e problemanan di kuminda. Nos ke investigá dikun un hende tin problema ku esei.

Aña pasá, a atendé 170 mucha entre 2 pa 18 aña na Seys. Ku 70 porshento, bo por bisa ku nan a kaba, Dumont ta bisa. E 30% restante ta bin aki tambe, ku yudansa i sosten di e mayornan.

Diferensia entre alzheimer i demensia

KRALENDIJK – Hopi bia ta konfundí alzheimer i demensia ku otro, sinembargo ta trata di dos diferente malesa. Boneiru no ta un eksepsion, aki tambe ta notabel e kantidat di hende relativamente yòn ku ta sufrí di un di malesanan akí, ku por presentá debí na diferente faktor.

Hopi biá ta konfundí alzheimer i demensia ku otro. Kiko ta e diferensia entre alzheimer i demensia. Den korto, demensia ta un término kolektivo pa mas ku 50 malesa diferente. Malesa di alzheimer ta un forma di demensia. Di tur forma di demensia, alzheimer, ta esun mas komun. Debí na demensia, e serebro ta keda afektá i un persona su salú mental ta deteriorá gradualmente.

E tipo di demensia mas komun ta alzheimer, demensia frontotemporal (FTD), demensia vaskular i demensia ‘lewy body’. Kada forma tin su mes karakteristiká.

Malesa di alzheimer ta un forma di demensia. 70% di personanan ku demensia tin alzheimer, malesa di alzheimer ta e forma mas komun di demensia.

Alzheimer ta kuminsá den e hipo kampo, den e parti mas profundo di e serebro. Den e área akí ta warda suvenir.

Na kuminsamentu, e pèrdida di memoria ta keda remarkabel komo resultado. Mas aleu, un persona ku alzheimer lo eksperensia problema ku pensamentu, akitut i idioma. Ademas e por enfrentá kambionan den karakter i komportashon.

Atvertensia pa posibel suplemento mortal den kuminda


KRALENDIJK / HULANDA – E instituto di salú públiko i ambiente di Reino, RIVM, ta atvertí kontra uso di sierto suplemento den kuminda. E ta trata di yerba, ku segun RIVM, ta dañino pa salú. Un di e yerbanan, ‘tabernanthe iboga’, por kousa morto, segun e instituto, pues ta deskonsehá su uso.

‘Tabernanthe iboga’ ta mas konosí komo ‘ibogaína’. E supstansia por alterá e ritmo kardiako i hende a muri pa motibu di dje vários biá rònt mundu, asta na Hulanda. Entre otro, a trata un muhé pa un adikshon di un naturópata di Kockengen, kende no a sobreviví.

Ademas, ta atvertí tambe pa ‘huperzia serrata’ i ‘ashwagandha’. Den algun pais, manera China i India, den pasado a usa ‘ashwagandha’ pa entre otro aborto.

Segun RIVM, guli ‘huperzia serrata’ tambe por tin konsekuensianan desagradabel, hende por sufrí molèster manera debilitashon muskular, bista skur, wowo i síntomanan di parálisis. Tambe tin evidensia ku e yerba akí ta dañino pa e veto.

Prinsipalmente serka hopi botika online, ‘huperzia serrata’ i ‘ashwagandha’ ta na benta, den forma di píldora i puiro. No ta konosí kuantu ta usa na Hulanda.



TUR DIA TA 8 DI MART??

NO, tur dia no ta 8 di Mart,
Bo ta di akuerdo ku mi?,
Pero esei nos tur sa,
Pues ban sigui kombersá.

Ken por bisa ku muhé ta débil?
Ken a inventá semehante ponensia?,
Muhé ta un ser fuerte ounke frágil,
Pero ku abilidadat i hopi resilensia.


Muhé ta pensa semper riba otro promé,
Pasobra puesto no ta importante p'é,
E tin konfiansa i hopi fé,
Di logra eksito unda ku bida benté.

Muhé su kurason ta grandi
Semper kapas pa sali padilanti,
I maske den su kurason tin doló,
E ta duna tur di su mes ku Amor.
Muhé ta mama, ruman i amiga,
Di gran balor pa tur ku e ta stima,
Semper kla ku un palabra di konsuelo,
Pa sostené kada un den nan anhelo.

Si, awe ta 8 di Mart,
dia internashonal di hende muhé,
Pero ta e dia aki so mester rekonosé?
365 dia di aña ta su dia,
Ku mester selebrá den dushi harmonia.

Selebrá bo dia tur dia muhé privilegiá,
Bo ta un ser rikamente bendishoná,
Sigui karga bo korona invisibel,
I sa ku pa Dios bo tin un balor indiskutibel.

Skirbí pa Ingrid Fenies
8 di Mart 2024



8 di Mart, un dia markante den historia di humanidat

Si, un dia ku ta konmemorá,
Ku hopi añanan pasá
Un grupo di hende muhé balente, determiná a lanta, protestá,
Kontra tur abuso i violencia, kontra tur loke ta inhustisia,
Eksigiendo rekonosimentu i igualdat,
Eksigiendo pa e karga su mes responsabilidat,
Eksigiendo derecho di libertat,
Pa por tuma su mes desishonnan,
i karga konsekwensia pa su akshonnan.

Pasonan grandi a wordu tumá,
Basá riba un lucha hustifiká,
Pasobra apesar di tur difikultat,
i hopi a paga ku nan bida buskando libertat,
Tabatin logronan significativo,
Pero...nos tin ku sigui ta aktivo,
Sigui empoderá i enkurashá e hende muhé,
Pa lucha pa protehá i mantené su derechonar di e komunidadat ku ta rondon'è.

Awe ta un dia di reflekshon i konmemorashon
Mirando bèk riba e hende muhé i su akshon,
Tur e lógronan grandi obtené,
Ku nos tur awe por gosa di dje.

Komo hende muhé nos por ta orguyoso,
Pesei nos ta uni awe den goso,
I nos ta pidi nos Dios bondadoso,
Pa sigui duna nos forsa i sabiduria,
Pa nos lucha por sigui te na viktoria.
Hoben, adulto, mama, amiga lanta,
Ban halsa nos bos i kanta,
Ban mostra mundo henter nos balor,
I karga nos lucha ku honor,
Ban eksigí respet i rekonosimentu,
Pasobra esaki no ta solamente algu di un dia òf momentu,
Nos dia ta awe, mañan i semper!!!

Skirbí pa Ingrid Fenies
8 di Mart 2024



Felis dia di hende muhé

Na e hende muhé nan Fuerte, Inteligente, Talentoso i simplemente maravioso di e mundu aki!
No lubidá nunca ku bota e ser mas stimá i apresia ta deseo di bonaire communication services



KADA HENDE MUHÉ KU LOGRO, TA INSPIRASHON PA OTRO HENDE MUHÉ. MI TA FUERTE, NA MOMENTU MI TIN E OPORTUNIDAT PA MOTIVÁ OTRO HENDE MUHÉ

Felis dia di hende muhé
MAYA

MUHÉ BO TA BALENTE

Muhé bo ta bunita i balente,
Bo ta e lus den skuridat di bo kas,
Bo tin un energia sorprendente,
Pasobra ta di hopi kos bo ta kapas.

Bo ta balente, bunita i sorprendente,
Bo ta yena bo kas ku lus i amor,
Bo ta un ser úniko i resplandesente,
Bo ta e sentro di alegria i kalor.

Bria muhé, bria i sigui bria,
No laga nada stroba ni kibra bo balentía,
Sigui bria tanten ku bo ta riba pia,
I tanten ku bo ta karga e energia

Bo ta un ser balorá i stimá,
Bo bunitesa no tin pa igualá,
Tur dia ta bo dia muhé bendishoná,

Awe mas ku nunca bo nómber ta menshoná
Manera un diamanta bo ta briya,
Firme i ku hopi seguridat,
Bo ta karga hopi simpatía,
Di tur ku stima bo di berdat.

Un abrazo fuerte pa tur e sernan muhé,
No pasobra awe e dia ta rekonosé,
Pero ta un honor ku bo meresé,
I ohalá bo lus por sigui resplandesé

Skirbí pa Ingrid Fenies
8 di Mart 2024

Medida waf di piskadó apnormal

KRALENDIJK -- Siudadano Shahir Theodora kier a trese su sosten na piskadónan i nan waf. Tin un kaso andando kontra e waf i e piskadónan. E desishon tumá kontra piskadó ta apnormal. Unda e pruebanan ta. Loke ta menshoná den e komunikado di Entidat Públiko Boneiru kontra su

propio hendenan ta tei tur tempu, di sùit te nort.

Si tuma e kehonan ei kontra e waf kua ta afektando e piskadónan, mester tuma di otro sitionan tambe. No ta na e waf ei so e kosnan ei ta pasa. Si e aktonan akí ta resien, bini ku prueba di e kehonan i aktonan kometé na e waf i ku fecha, pasobra, segun

Theodora, el a lesa par di kos nunca el a tende ni mira sosodé entre Kas di Regata pa e waf di piskadó. Pues bini ku prueba pa e pueblo i stòp di tuma e pueblo hasi. I e pueblo tambe mester lanta para e abuzunan akí.

Theodora: “Gobièrnu di Boneiru i Kuerpo Polisial por skirbí loke nan ke den komunikado i laga bo kere,

esei no ta e kaso mas serka nos akí na Boneiru. Trese prueba dilanti sino, no mete ku nos pueblo. No keda bini ku rumor riba pueblo. Pasobra basta hende sa kaba ken ta duna òrdu na Entidat Públiko Boneiru. E weganan akí ta yegando nan final, sea na bon òf na malu.”

Theodora ta pidi pueblo lanta pa bo derechonan i protehá nos piskadónan, esaki ta akto kontra

piskadó. Stòp di laga Gobièrnu keda imponé kos inkorekto den boso bida. Lanta for di soño, boso tin mas derecho i poder ku Gobièrnu si mester protesta pa protekshon di nos wak i pa boso derechonan hasié, pueblo ta ku boso.

Meskos ku a plama e notisia riba media sosial, nos ta hasié mas grandi pa mundu mira e abuzunan akí. Huntu nos ta logra. Bin bon, òf no bin.

Baby Dock den fase final

KRALENDIJK – Captain Dons Habitat a bin ta trahando duru pa kumpli ku e tempu stipulá pa asina pronto por duna e mihó eksperensia den servisio di e sentro di buseo.

BabyDocktadensuetapa

final di rekonstrukshon. Esaki ta un instalashon ku ta impresindibel i ta un desaroyo ku e hotèl ta apresia hopi. Aktualmente ta poniendo e dos trapinan na Baby Dock. Mesora ku e waf ta habrí, lo informá tur

hende.

Captain Dons Habitat ta gradisí tur hende pa nan pasenshi, pronto lo muestra nan e resultadonan di e inkreibel i hopi nesesario remodelashon di e Habitat di e ser stimá, Capitan Don.



Tene nos playanan limpi



èxtra
...number 1

www.extraboneiru.com



Payroll Pro

HRM

www.payrollprohrm.com



The most complete payroll and HR software in the Caribbean!

Download the mobile app!



Seshon edukashonal pa studiantenan di Seamester

KRALENDIJK – Luna pasá Reef Renewal Foundation Bonaire a haña bishita di un grupo di

studiantenan di Seamester, durante nan biahe momentu ku nan ta biahe for di Karibe pa Tahiti.

Lola, e ofisial di programa di edukashon di Reef Renewal Foundation Bonaire, a subi bordo di

e boto Argo, durante su parada na Boneiru, pa papia di tur loke ta relashoná ku restourashon di koral.

krusial i a profundisá den diferente téknika i proyekto aktual na Boneiru.

Un gran gradesimentu na Seamester pa invitá Reef Renewal Foundation Bonaire i ta deseá e mihó di suerte den e resto di biahe Tahiti.

Ku e ekipo interno, Lola a kubri e konseptonan básiko di e refnan di koral di Reef Renewal Foundation Bonaire, el a enfatisá dikun e restorashon aktivo ta asina



IND-CN será riba 15 di mart

Servisio di imigrashon i Naturalisashon Hulanda Karibense (IND-CN) ta será riba 15 di mart. IND-CN ku dedikashon ta empenhá su mes e dia aki pa BON DOET, STATIA DOET i SABA DOET.

BON DOET, STATIA DOET i SABA DOET ta akshonnan boluntario. Riba 15 i 16 di mart ta ehekutá desénas di trabou serka diferente fundashon i asociashon. Tur hende ta invitá pa partisipá.

Riba djaluna 18 di mart IND-CN ta disponibel atrobe segun orario di ofisina normal.

Kontròl zeta kantu di kaminda

KRALENDIJK -- Djamars atardi Direktorado di Supervishon i Mantenshon di Lei, a hasi akto di presensia na Kaya Barakuda pa inspekshoná

e posibel zeta di kushina ku tin bashá riba tereno públiko.

Un ratu promé, segun Noel Janga di Evidensia Real, e empresario ta sali

pafó ku wea di aros atrobe benta gewon abou pariba di kaminda. Janga ta spera ku lo por bini un solushon pa e aktitut a-higiéniko di e empresarionan asiátiko akí.



Nestor Porfirio Janga a bai nos dilanti

Pa: Josefina Trinidad-Piar

****Nos amigu di kas.** Hopi kos nos tabata hasi huntu den famia. Pasobra nos a konsiderá Pro, manera nos ta yam'é, komo parti di famia ku nos a stima. Semper nos sitio di enkuentro ta na kas di mi mama Tecla, pa nos hunga dominó i pasa hopi prèt.

Pro ta gosa un bòl i ta keda henter ora djente afó. Lo mi keda semper rekordá kon dia mi a haña sorpresa di mi 60 aña, ku mi a haña Pro tambe ku a biaha bin Aruba pa ta parti di mi sorpresa. Nos a biaha huntu pa Colombia.

Semper nos tabata forma grupo pa nos hasi kosnan gezellig huntu ku nos famia. I semper Pro tabata presente.

Pro tabata gusta pa partisipá semper huntu ku nos.

Pro a bai Hulanda pa regresá bèk despues di 3 luna.

Nunka mas Pro a bini bèk. Nos semper a puntra pa Pro, pero sin por tin kontakto kuné.

Pro estando na Hulanda, a manda un kariño pa mi.

Kual mi a apresia hopi den prinsipio ku Pro a bai. Pero despues tabata hopi difísil pa nos a tende profundamente di nos Pro stimá.

Nos no sa sí ainda e espasio lo tei ku nos por mira Pro pa e último biá na mundu. Esei sigur nos ta pendiente di dje pa sa ku su último tributo lo tuma lugá na Boneiru òf Hulanda mes.

Pro tabata un plaser di tabatin bo pa basta aña huntu ku nos i nos lo sigui rekordá e bon tempu ku nos a pasa huntu.

Bo sa kon nos tabata apresia bo i stimá bo. Awor nos a pèrdè un di nos miembronan di nos tim di dominó WAÑAP.

Pro drumi dushi i nos lo sigui ku rekuerdonan ku a keda atras den felis memoria.



Rijkdienst Caribisch Nederland
Onderwijs, Cultuur en Wetenschap

Invitashon anochi informativo Wet Studiefinanciering

Apresiabel studiante,

RCN-Studiefinanciering ta invitá bo **huntu ku bo mayor(nan)** na un anochi informativo, kaminda funshonarionan di RCN-Studiefinanciering lo duna splikashon kiko WSF-BES ta enserá.

Esaki lo tuma lugá:

Djammers 12 di mart 2024 pa 7'or di anochi den sala di reunion 'Aquarius' di Captain Don's Habitat Bonaire na Kaya Gobernador N. Debrot 103

Por favor trese pèn i papel pa hasi anotashon.

Na nòmber di Rijkdienst Caribisch Nederland - Studiefinanciering,

Jefferson Coffie
Kordinadó di kalidat WSF BES

Aktualisashon proyekto monitoreo di para

KRALENDIJK -- Aña pasá, Dutch Caribbean Nature Alliance (DCNA), ofisialmente a lansa e proyekto monitoreo pa konservashon di biodiversidat di para na Karibe Hulandes. E iniciativa akí ku Ministerio di Agrikultura, Naturalesa i Kalidat di Kuminda ta sostené, tin komo meta pa ekipá organisashonnan lokal di maneho di naturalesa na Aruba, Boneiru, Kòrsou, Saba, Sint Eustatius i Sint Maarten, ku instrumento pa aktivamente monitoreá i protehá populashonnan di para di tera i nan alrededor.

Despues di un promé aña eksitoso, tur e islanan ta preparando pa e próksimo kolekshonamentu di informashon den primavera.

E proyekto dinámiko akí, impulsá pa siensia, ta mas ku solamente kolekshonamentu di informashon. E ta fasilitá tambe análisis i interkambio di konosementu di tendensianan den informashon di populashon di para, di manera ku ta optené konosementu mas profundo den salú di medio ambiente di tur e seis islanan di Karibe Hulandes.

E proyekto ku ta planiá pa e promé kwartal di 2028, ta hasi uso di entrenamentu mehorá, programanan di monitoreo standarisá i investigashon den vèlt pa proporshoná konosementu balioso pa loke ta trata



salú di ekosistemanan lokal. Pa medio di evaluá e abundansia relativo, e komposishon di espezie i e kambionan den medio ambiente, e iniciativa ta ofresé un lèns úniko ku por evaluá salú en general di ekosistemanan kuné.

Banda di esaki, para ku ta aktua komo aktornan klave den ekosistemanan insular, ta kontribuí na polinisashon i plamamentu di simia i nan ta asentuá importansia di áreanan protehá pa espesienan vulnerabel.

Konosementu optené

Miénttras kada isla ta prepará su mes pa e

próksimo kolekshonamentu di informashon di primavera, ta esensial pa pensa tokante algun konklushon intrigante for di e investigashonnan di aña pasá.

Na Aruba i Boneiru den otoño nan a opservá ménos espezie kompará ku den primavera i e espesienan tabata repartí den un forma mas uniforme den e supstrato di lava.

Na Kòrsou den otoño nan a opservá mas espezie i e rikesa/uniformidat tabata un tiki mas tantu ku den e supstrato di lava. Durante e investigashonnan di otoño na Aruba, mas tantu biaha nan a opservá e chuchubi

tropikal, mòfi, totolika i e chibichibi, barika hel, bachi pretu, miénttras ku na Boneiru e prikichi, tirano grandi, chuchubi tropikal i trupial Venezolano, tabata e paranan mas komun.

E para di misa ta esun ku nan a opservá mas tantu biaha na Kòrsou, siguí pa e chonchorogai, chibichibi barika hel/bachipretu) i chuchubi tropikal. Den primavera i den otoño, e abundansia relativo promedio di tur e espesienan ku nan a opservá tabata mas tantu den kalichi ku den e supstrato di lava na Aruba i Boneiru. Na Kòrsou esaki tabata e kaso tambe den primavera, pero no den otoño.

Meskos ku na Aruba i Boneiru, den primavera nan a registrá mas tantu espezie na Sint Eustatius i Sint Maarten, kaminda e espesienan tabata repartí mas uniforme den mondi seku. Ta posibel ku e espesienan mas raro ku ta biba den zonanan di transishon ta agrupá den áreanan di mondi, kompará ku e espesienan mas general ku un plamamentu mas amplio.

Na Saba den otoño nan a opservá mas espezie den mondi seku i den selva tropikal, pero ménos den e zona di transishon, entre áwaseru i mondi seku. Chibichibi barika hel/bachi pretu, tabata un di e tòp kuater espesienan mas tantu opservá na tur e tres islanan, huntu ku chuchubi wowo blanku, palabrua, bloudùif, palomba pretu, na Saba

zenaida dove, chuchubi wowo blanku i antillean crested hummingbird na Statia i mòfi, lesser antillean bullfinch i wimpi, chonchorogai na St. Maarten).

Esfuerso di e seis islanan

Gustosamente DCNA ke gradisí tur e islanan pa nan dedikashon pa hasi e promé aña di kolekshonamentu di informashon un éksito i Ministerio di Agrikultura, Naturalesa i Kalidat di Kuminda, pa e finansiamentu.

Despues di tempu e tendensianan di populashon lo hasi posibel pa e parkenan konsiderá si ta nesario pa implementá strategianan èkstra di konservashon pa espesienan raro òf espesienan ku ta birando ménos.

E proyekto akí ku ta dura sinku aña, lo proporshoná konosementu krusial den e státus di populashonnan di para di tera ku ta brui na tur e seis islanan di Karibe Hulandes i lo duna trahadónan di maneho instrumentonan pa por traha mihó plannan pa konservashon efektivo di espesienan lokal riba término largu.

Entre luna di mart i aprel ta kolekshoná informashon di primavera na tur e seis islanan pa aña 2024, pues tene outoridatnan lokal di maneho di parke na bista pa e último informashonnan.

Pa mas informashon i entrevista, por favor tuma kontakto ku research@DCNANature.org





DEN PASO DI BÒI

Un di e programanan ku mi gusta graba mas, den kuadro di Herensia, ta e seri kaminda mi ta kana den bario Nort di Saliña huntu ku Stella i Rudy Mercera pa papia di kasnan den e bario i kende a biba den nan. Nos ta purba graba mas frecuente posibel, esta un bes pa siman. No tur biá sinembargo nos ta logra. Pero kon ku bai bini, e siman

aki nos a graba esun nr. 26 kaba.

E promé programanan nos a pone bou dje nòmber di 'Aki Boneiru'. Despues nos a disidí di pone nan bou di Herensia mes. Inspirashon pa e seri di programa aki a bini di Japi Oleana, kende a kuminsá tene algun aña pasá dia promé di mei, un kaminata

den Rincon, huntu ku Nel Janga, pasando a lo largo di kasnan 'bieu' pa konta di nan habitantenan. Mi a kopia e idea ei i a aplik'é den Nort di Saliña, bario na unda mi tata a nase i lanta. Mi tin laso fuerte ku e bario aki, konosí ántes komo Kuku Bieu.

Rudy i su ruman Stella ta dos ensiklopedia hu-

mano. Nan a haña hopi informashon di nan wela Maria Martilio-Martijn, un hende muhé skèrpi ku a bula 100 aña di edat i kende m'a entrevistá pa mi programa di radio. Stella den e seri di programa ta referí tambe na su wela: "Wela a konta nos...." Bunita referensia.

E siman aki nos a graba den e parti nort di Kaya Kasike, na kasnan di Shon Pa i Benilia Evertsz, Chilán i Atancia Muller, Jerónimo i Petra Nicolaas. Especialmente e kas di Chilán i Atancia a tuma su tempu, pasobra ta dos persona ku a laga nan stèmpel atras den e bario aki i Boneiru kompletu.

Mi ta kalkulá ku nos lo bai

keda kla ku grabashon den e bario e aña aki, teniendo ku ta sosodé ku tin bes nos ta bula algun siman sin graba. Ta surgi otro trabou ku nos mester kumpli kuné. Mi deseo ta pa bini ku e tipo di programanan aki tambe pa otro barionan, manera Antriol. Pero pa logra esaki mester di bolutario pa kana den e bario aki i graba. Mi so no por. Antriol ta un bario grandi. Ta algu ku lo bai tuma mas ku un aña di grabashon.

Ainda tin barionan manera Nikiboko, Tera Kòrá i Playa.

Pa e último aki mi tin un otro idea, mirando ku un parti grandi di e edifisio nan den Playa a disparisé. Keda pendiente.



Durante e grabashon e siman aki nos a haña kompañò di un kachó pretu ku a bin tras di Rudy, kende a duna e kachó aki e nòmber di Buchi Pe. No ta su kachó.



Santo Muller, yu di Luis i Angela Muller, ta habitante awendia di e kas di Chilán i Atancia.

MONCHI & TONCHI

Tonchi mañan ta di dia di hende...

Awèl si laga nos deseá nos hende muhé nan un felis dia di hende muhé.

KOLOFÓN

Editor: Bonaire Communication Services N.V.
Kaya Irlanda 12,
Tel. 717-8482

Redakshon: extrabon@gmail.com
aviso: avisobon@gmail.com
Wèpsait: www.extraboneiru.com
Facebook: Extra Boneiru

<p>Direktor Shirley Martis 785-3824 796-3824</p> <p>Hefe di redakshon Nathaly Evertsz-Ipcedencia</p> <p>Redakshon Papi Antoin Edson Pietersz Ibi Piar (deporte)</p>	<p>Partner na Aruba Awe Mainta</p> <p>Partner na Kòrsou Extra</p> <p>Partner na Boneiru Live99</p> <p>Layout Maya Beaumont</p> <p>Konsehero: Bòl Antoin 786-6818</p> <p>Aviso avisobon@gmail.com</p>
--	--

Ningun hende por biba sin fe, sin kreensia, pasobra nos tur ta konfia asina tantu persona ku nos ta topa kontinua-mente, òf pasobra nos ta suponé ku kosnan “lo a funshoná” di moda korekto i asina lo ta posibel hiba nos proyektonan padilanti.

San Cirilo di Herusalèm (obispu di siglo IV) a ilustrá e idea aki den un katekesis dirigí na esnan ku tabata bai risibí boutismo. Ora el a splika nan ku fe no ta algu únika-mente pa kristiannan, Cirilo a mostra kon hopi persona ta hasi loke nan ta hasi dor di fe.

”Tampoko tin ku pensa ku e prestigio di fe ta duna únika-mente entre esnan ku ta protehá nos bou di e nòmber de Kristu, sino ku tur loke ta hasi riba mundu, inkluso di parti di esnan ku ta leu di Iglesia, ta keda penetrá dor di fe”.

Kua ehèmpelnan ta ilustrá e bèrdat aki? San Cirilo a pone 4 ehèmpel: esun di e esposonan, esun di e kampsino, esun di e nabegante, i esun di negoshi:

”Pa medio di un fe, dos persona straño ta uni dor di leinan nupsial; personanan otro na esun otro ta drenta den komunión di kurpa i biennan mediante e fe ku tei presente den e kontrato matrimonial. Tambe den un sierto fe ta apoyá e trabou agríkola, pues esun ku no tin speransa di risibí fruta no ta kuminsá traha. Ku fe hòmbenan ta subi laman ora,

Nos fe di kada dia

Fernando Pascual

konfiando den un tronkon di palu chikí, ta kambia solidés di tera pa e agitashon di olanan, entregando nan mes na speransa insierto i mustrandu un konfiansa mas sigur ku kualkier haf. Den konfiansa, finalmente, negoshi di hendenan ta apoyá”.

E lista di ehèmpel lo por ta muchu mas largu: dor dia fe dos hende a kuminsá na ser amigu, un sòldá ta obedesé su kapitan, un siudadano ta pidi hustisia na tribunalnan, miles di persona ta duna nan voto na un kandidato, kasi nos tur ta rekurí na un médiko pa aliviá nos malesanan...

Pa desgrasia, tin biaha ta duna engaño i froude. E fruta ku nos a pensa di ta bon, konfiá den e sonrisa di e bendedó, ta resultá di ta yen di bichi. E amigu ku nos lo a ofresé un fianza pa sali di un pèrta a kombertí den un usuario kruel. E konfidente na kende nos ta habri nos kurason ta divulgando sekretonan masha personal na otro personanan. Inkluso nos tin di rekonosé, ku pena, nos a faya ku esnan ku a pone nan fe riba nos skoudernan.

Apesar di e frakasonan, fe humano ta un ingrediente impresindibel di bida. Pasobra nos ta konfia e konstruktornan kon nos por ta trankil di e kas, polis na ora di kana riba kaya, sobra shofùrnan ora nos ta kore

outo riba kaya, e funshonaronan ora nos ta pidi un serti-fikado, inkluso e polítikonan bon (ku tin) na e ora di soña den un mundu un poko mas hustu i mas bon.

Ora el a refleksioná riba e eksperensia humano universal, Papa Huan Pablo II a definí hende komo “animal di kreensia”, pues “den bida di un hende e bèrdatnan simple-mente keré ta muchu mas numeroso ku esnan haña mediant e komprobashon personal. En efekto, ken lo ta kapas na diskutí krítikamente e innumerabel resultadonan di siensianan riba loke e bida moderno ta basa? Ken lo por kontrolá pa ku kuenta e fluho di informashonnan ku dia pa dia ta ser risibí di tur parti di mundu i ku ta ser akseptá den e linia máksimo komo berdadero? Finalmente, ken lo por rekonstruí e prosesonan di eksperensia i di pensamentu pa kua a akumulá e tesoronan di sabiduria i di religiosidad di humanidat? Hende, e ser ku ta buska e bèrdat, ta pues tambe esun ku ta biba di kreensianan” (ensíklika

“Fides et ratio” n. 31). sigui awe riba kaminda: yudá dor di shentiun di mannan amigu i ku e posibilidat di ta, nos tambe, hòmber i muhénan den kua otro-nan por pidi yudansa den e dis-tinto situashonnan di bida.

Kosnan ku nan nòmber

Anónimo

Loke nan ta yama di kai i bolbe lanta, di frakasá i bolbe kuminsá, di sigui un kaminda i tin ku drei e, di topa ku doló i tin ku konfront’é, esaki, no yam’é atversidat, yam’é **SABIDURÍA**

Loke nan ta yama di sinti man di Dios i sa ku bo ta impotente, di fiha un meta i tin ku sigui otro, di hui di un prueba i tin ku enfrent’é, di planiá un vuelo i tin ku kòrta den dje, di aspirá i no por, di ke i no sa, di avansá i no yega, esaki, no yam’é kastigu, yam’é **ENSEÑANZA**

Loke nan ta yama, di pasa dianan huntu radiante, dianan felis i dianan tristu, dianan di soledat i dianan di kompania, esaki, no yam’é rutina, yam’é **EKSPERENSIA**

Loke nan ta yama, di ku bo wowonan ta mira i bo oidonan ta skucha, i bo serebro ta funshoná i bo mannan ta traha, i bo alma i bo sensibilidat ta sinti, i bo kurason ta stima, esaki, no yam’é poder humano, yam’é **MILAGER**

Pèrlanan ta produkto di doló

Tur pèrta ta konsekuensia di un uster ku a ser heridá dor di un grano di santu ku a drenta den su interior. Un uster ku no a ser heridá no por produsí pèrta.

Den e parti interno di e uster tin un sustansia yamá “nácár” i ora un grano di santu penetrá den e uster, esaki ta kubrié ku kapanan di nácár pa protehá su mes, dunando komo resultado, e ta bai formando un pèrta bunita i briante.

Bo a sinti bo mes heridá dor di palabranan òf aktitudnan di un persona? Bo a ser akusá di bisa kosnan ku nunca bo a bisa? Bo ideanan a ser rechasá òf redikulisá?

Nan a kulpa bo di a hasi algu ku hamas bo a hasi? Bo aktitut frente sierto situashonnan, ta ser malinterpretá?

Bo a sufri algun bia di gòlpinan di indiferensia? A heridá bo presisamente e personanan ei ku ménos bo a spera?

Nan no ta balorá bo man-

era realmente bo meresé?

E ora ei, pordoná i hasi di bo herida un pèrta. Kubri bo heridanan ku vários kapa di amor, kòrda ku mas kubri bo herida ta, ménos doló lo bo sinti.

Por lo kontrario, si bo no kubrié ku amor, e herida ei

lo keda habrí, e lo hasi bo mas doló kada dia mas, el lo infektá ku resentimentu i amargura i pió ainda, nunca e lo sera.

Un pèrta ta un herida kurá dor di e amor di Dios.

(Pader Guillermo Serra)

Palabranan di aliento

No yora pa loke bo a pèrdè, lucha pa loke bo ta keda kuné.

No yora pa loke a muri, lucha a loke a nase den bo.

No yora pa esun ku a bai, lucha pa esun ku ta ku bo.

No yora pa esun ku ta odia bo, lucha pa esun ku ta stima bo.

No yora pa bo pasado, lucha pa bo presente.

No yora pa tu sufrimentu, lucha pa bo felisidat.

Ku e kosnan ku ta sosodé ku hende nos ta bai siñando ku nada ta imposibel pa solushoná. (Papa Francisco)

Lágrimanan ta seka i no ta solushoná nada.

Resentimentu no ta kambia pasado i ta amargá presente.

Rekuerdonan negativo di pasado no ta hasi nan nobo, pero ta amargá abo.

Mihó nos lucha pa loke ta nobo.

Mihó nos lucha pa kambio.

Mihó nos lucha pa futuro.

Kòrda loke a sosodé por yuda nos na mira futuro, pero no pa kambia pasado. Mantené e heridanan di ayera bibu ta renobá e doló di ayera pero sin kambia nada. Lo úniko ku ta kambia e ayera ta un awe i un mañan nobo.

Sin diploma, pero importante

Tin hende ku no tin diploma, pero tur hende ta respet’é.

Tin hende ku no tin título, pero tur hende ta admir’é.

Tin hende ku no tin doktorado, pero tur hende ta skuch’é ku smak.

Tin hende ku no ta figura pa nada, pero tur hende tin rèspèt pe.

Tin hende ku no tin famnan grandi, pero tur hende ta admir’é.

E berdadero altura di hende no ta den su diplomanan, sino:

Den e bèrdat di su bida.

Den e honestidat di su bida.

Den e sinseridat di su bida..

Den e testimonio di su bida.

No ta e kaha loke ta duna balor na e contenido.

No ta e diplomanan loke ta hasi e hende grandi.

Ta posibel ku abo ta sinti bo mes poko kos; sin embargo, otronan ta konfia bo.

Ta posibel ku abo no tin título algun; sin embargo, otronan ta kere den bo.

E bèrdat di bo bida ta loke ta duna bo prestigio i balor.

No ta e pakete ni e propaganda, ta abo mes ku bo bida.

E por ta un bida simpel, pero den kua tur hende ta konfia.

Esaki ta bo berdadero outoridat.

E ta bo ser i no bo aparensia i propaganda.

Ta p’esei, sea di bèrdat, i lubidá loke otronan ta pensa òf bisa di bo.

ARUBA

Lider di AVP, mr. Mike Eman:

Gabinete Wever-Croes ta devastador p'e porvenir di Pueblo

ORANJESTAD -- Gabinete Wever-Croes II ta hortando e futuro di Aruba. Den e recién rapport anual di Raad van Advies mr. Mike Eman ta mira como confirmacion cu e actual gobierno ta hortando e porvenir di pueblo di Aruba.

Mr. Mike Eman a cuminsa na cita e activista hoben, Greta Thunberg, medio ambientalista cu den United Nations a expresa na gobernantenan cu ta negligando e consecuencia devastador di cambio climatico cu e siguiente sentimento: "You are stealing our future in front of our very eyes". Den e contexto aki mr. Mike Eman a cita un cantidad di paragrafonan for di rapport anual di Raad van Advies caminda e ta constata cu e sufrimento cu e ta sinti y mira den bario y hogarnan ta evidencia con devastador Gabinete Wever-Croes ta y ta hortando e porvenir actual di Pueblo y ta futuro di Aruba.



Mr. Mike Eman a trece dilanti e conclusionnan mas preocupante den e rapport di Raad van Advies. El a cita: "Fuera di e resiliencia di e economia, tambe e resiliencia di e hogarnan di Aruba ta bou presion".

RvA ta muestra cu ta parce cu tin poco atencion pa siguridad social y financiero di e ciudadanonan, hopi no ta den un condicion cu nan no tin opcion mes pa scoge un direccion pa provee nan cu un porvenir. E desaroyo di economia no ta bay pareu

cu e desaroyo financiero di nos pueblo, specialmente pa esunnan cu ta na e nivel mas margina den nos sociedad e situacion ta birando tur dia mas facil.

Esaki Eman ta bisa ta e pobresa cu nos ta mira y sinti, un pueblo sin opcion y perspectiva, un ciudadanía yena cu debe y un deficit continuo den nan entrada pa cubri pa un existencia basico. Pa Eman, e conclusion aki di Raad van Advies ta bisto for di varios aña caba

den comunidad ora cu e ciudadano no por paga pa e costo di bida of e remedi cu e tin mester of ora cu mayornan no por paga pa e aumento den schoolgeld. Esey ta e manera con Gabinete Wever-Croes II ta hortando for di pueblo di Aruba. E ta referi na un inflacion persistente di 8% cu ta directamente relata na e peso fiscal riba cabes impone door di e gobierno aki cu un cantidad do medida, mencionando especificamente e aumento di BBO y e introduccion di BBO na frontera. Citando cifra di CBS y di Banco Central, e rapport aki ta menciona cu e situacion financiero di e Arubiano ta den un pleno crisis door cu por lo menos 50% di e poblacion ta gana menos di e minimo cu e mester pa biba y cu e diferencia aki ta esun di mas grandi den ultimo seis aña; exactamente e mesun tempo cu nos pais ta bou mando di un coalicion lidera pa partido MEP.

"Miseria ta batiendo na

porta di tur hende na Aruba, mientras cu ministernan y parlamentarionan di Gabinete Wever-Croes II y MEP y Raiz ta biaha rond mundo gabando con bon economia di Aruba ta," Eman a expresa cu indignacion pa e maneho desastroso y e efecto cu e tin pa e ciudadano.

Despues di a mira tur e argumento y conclusion cu Raad van Advies ta ofrece den su rapport anual 2023, e determinacion di partido AVP pa rescata e futuro di Aruba y defende e bon comun, ta mas fuerte cu nunca. Eman: "Cada bes Aruba a confronta reto y crisis grandi, cada bes cu tabatin e anhelo pa un cambio grandi, e solucion y compromiso a sali for di e cuna aki, y un biaha mas ta for di e cuna aki di AVP ta bay rescata Pais Aruba y rescata e futuro di e ciudadano Arubiano. Nos ta BOLTER E COS aki pasobra e momento a yega pa pone e pais aki bek den man di pueblo."

Parlamentario Ricky Hoek (MEP):

Plan di Mayor a drenta na vigor na beneficio y proteccion di nos muchanan

ORANJESTAD -- E tema di Plan di Mayor, cual a drenta na vigor dia 1 di maart 2024, ta uno hopi importante pa sigui elabora riba dje mirando e relevancia cu e tin den comunidad pa loke ta e proteccion di e muchanan. Parlamentario di Fraccion di MEP, Ricky Hoek a splica cu Plan di Mayor ta uno cu a cana su caminda te cu por fin el e bira un realidad.

Ta un iniciativa di colega di MEP, Michella Steenvoorde-Lacle, ken a traha duro hunto cu su team riba e plan di mayor y e ley aki. Esaki ta un ley hopi importante pa loke ta

trata e muchanan, Hoek a enfatisa. E ley ta encera cu ora un pareha divorcia of separa, nan mester yega na otro pa asina pone riba papel kico ta bira e futuro di e yiu of yiunan, pa loke ta e responsabilidad di cada mayor, como tambe participacion di e yiu den e programa aki.

Ricky Hoek a indica tambe cu tur esaki mester sosode prome cu e divorcio yega asina leu. "Unabes cu e Plan di Mayor ta traha, ora cu yega dilanti di mesa berde, señor hues lo puntra pa e plan di mayor aki y esaki mester wordo poni dilanti pa asina

muera cu en berdad e mayornan a traha hunto na e plan di mayor cu ta na beneficio di e yiunan".

Den caso cu e acuerdo entre e mayornan no bay segun ta desea, kieren cu no tin un plan hunto, e ora pa e casonan aki tin 'mediation' cu ta un persona cu ta bay para meymey y cu ta bay yuda den e proceso dunando e mama y e tata e guia, como tambe na e yiu.

Na final, e plan di mayor lo ta pa percura pa e guia y educacion di e yiu den futuro, e parlamentario a enfatisa.

Pa aworaki, "nos ta sumamente contento

cu dia 1 di maart Plan di Mayor a drenta na vigor y sigur esaki ta bay ta na beneficio di nos muchanan, pero tambe di e mayornan, di

otro instancianan como tambe di e netwerk cu ta rond di e mucha, pasobra e mucha mester keda central", Parlamentario Hoek a finalisa.



KÒRSOU

Ku 'Un anochi na NICE'

Clifton End i Stanley Clementina ta trese R&B na papiamentu bèk

WILLEMSTAD – 2024.

Kantante Clifton End, konosí pa su versatilidat musikal, ta bai bèk na su 'roots' di R&B ku e piesa sensual tituló 'Un anochi na NICE.' Aki, Clifton ta kolaborá ku e talentoso kompositor i kantante Stanley Clementina, pa produsí un R&B na papiamentu, algu ku no a keda hasi anteriormente.

Ku 'Un anochi na NICE,' Clifton i Stanley a hinka músika R&B na papiamentu den un bachi nobo, pero tòg ku un toke di R&B tradishonal, inspirá pa artistanan manera R Kelly i Jodeci, kende a perfekshoná R&B sensual popularisá na aña '90. Stanley Clementina a areglá i komponé e piesa, pero Stanley, Clifton End i Vincent da Silva a skibí e letranan. Segun Clifton, 'Un anochi na NICE,' ta deskribí un anochi sensual entre un pareha na Nice, Fransia, unda pashon ta para sentral.

Clifton su gira europeo i plannan grandi pa futuro Clifton tin varios piesa kompletá ku lo keda publiká e aña aki, ku ta varia di Ritmo Kombiná na papiamentu, pa piesanan di R&B. Na òktober 2023, Clifton a haña un oportunitat úniko pa bai riba un gira europeo ku e banda The Chicago Funk ku nan 'Earth, Wind and Fire Experience'. E gira ta asina eksitoso ku ya nan a anunsiá nan gira teatral ku ta planiá pa sèptèmber

Aktualmente Clifton ta trahando riba dos álbum pareu. Un di R&B i Soul i e EP tan spera, tentativamente tituló 'Mi Pais,' ku ta planiá pa sali na 2024. Pronto Clifton lo lansa e kolaborashon ku Buleria, kual ta e 'remake' di 'It's All About You,' ku kantante Buddy Love. Anteriormente, Buleria a invitá Clifton riba 'Wat Is Je Naam', i awó e talentoso banda rubiano ta debolbé e favor.

Stanley Clementina ta bai pone 2024 na kandela Stanley Clementina tin plannan grandi pa 2024 i tin varios proyekto alentador na kaminda. Pronto Stanley lo saka un kantika rapper DONGO i e talentoso Jandino Asporaat. Despues di esei, e siguiente álbum di C-Shaw ta bai sali, e banda di Kompa funda pa Stanley. Tambe Stanley a kontinuá su kolaborashon musikal ku kantante Jayh Jawson, unda ya pa algun aña e ta funkshona komo su direktor musikal.

Aktualmente Stanley ta preparando pa Jay Jawson su presentashon na AFAS, akompañá pa Steez Music Band, otro banda funda i guia pa Stanley. Stanley i Jayh Jawson, ya a kolaborá riba varios hitnan memorabel manera 'Wowo Sera,' 'Amor Sekreto' i 'Mijn Only.' Djasabra ultimo, Stanley i amigunan a presentá na Feel Good Festival, riba tarima di Islemunda na Hulanda.



Radio Hoyer ta selebrá 70 aña di eksistensia

WILLEMSTAD – Djadumingu 10 di mart ta un dia spesial pa Radio Hoyer, ku despues ta selebrá oficialmente su 70 aniversario. E hit históriko akí ta koincidí cu e 40 aniversario di 'E solo di pueblo', e transmishonnan pionero ku energia solar for di Tafel Berg, un inovashon posibel danki na e tékniko Fred Chumaceiro.

Na honor di e selebrashon dòbel akí, ta organisá un seremonia sobrio, ku ta inkluí un Santu Sakrifisio di Misa na Katedral di Pietermaai, sigui pa un enkuentro di konvivenzia.

E selebrashon ta kuminsá dia 10 di mart 9'or di mainta ku un Santu

Sakrifisio di Misa, presidí pa Obispu Luis Secco, na Katedral di Pietermaai. E kor Guadalupana ta animá e servisio musikalmente. Despues di misa, e invitadonan ta invitá pa bebe chukulati kòrá i lèter den e hòfi di Katedral, reuní e komunitat den un atmósfera di remembransa i goso.

Komo parti di e selebrashon, Tim de Wolf, un eksperto di Hulanda kende a digitalisá tantu e archivo di Radio Hoyer komo e registronan di Hoyco, lo duna konferensia i entrevista e luna akí. Su presentashonnan ta duna informashon riba e balioso trabou di digitalisashon di e legado di e defuntu Horacio Hoyer, kontribuyendo na e

historia riku di e stashon.

Radio Hoyer ta probechá e hubileo pa rekordá su historia rito ku un seri di transmishon kultural, deportivo i di notisia. E presentadónan aktual i anterior, ta presentá programa spesial durante henter aña pa entretené i informá e ouditorionan.

E organisashon ta invitá tur hende pa partisipá na e selebrashon riba 10 di mart na Katedral Pietermaai i despues via frekuensia 101.9.

Radio Hoyer ta konosí komo memoria di e poblashon i segun e stashon, e ta keda un fuente esensial di informashon i entretenementu pa e komunitat di Kòrsou.



STATIA/SABA/ST. MAARTEN

Bishita di trabou eksitoso na Hulanda

THE BOTTOM -- Durante e di dos mitar di febrüari 2024, un delegashon chikitu di Saba a bishitá Den Haag, interakshonando ku diferente ministerio i organisashon riba e problemanan mas relevante ku ta afektá Saba. Kompañando Diputado Bruce Zagers den e bishita

akí, tabata Sekretario Insular, Bram Streppel, hefe di Ofisina di Pólisa i Proyecto, Nicole Johnson, gerente di Aeropuerto, Maegan Hassell i asesor di pólisa, Courtney Hassell.

A tene un seri di reunion ku Ministerio di Interior, BZK, kaminda a diskutí temanan manera kompensashon liber i

e rapòrt mas resien di Ideegra. E estudio Ideegra ta riba enkargo di BZK, ku e meta di duna un análisis di ki nivel di kompensashon liber ta nesario pa e entidatnan públiko kumpli adekuadamente ku nan obligashonnan legal. Otro diskushon ku BZK, tabata inkluí e pakete Saba, banko, transporte públiko, konekshon i oportunidatnan di finansiamentu pa proyekto. E delegashon tambe a tene kombersashonnan amplio ku Ministerio di Asuntunan Ekonómiko i Klima i e agensia di empresanan di Hulanda, RVO. Algun di e diskushonnan akí, a enfoká riba analisá planiá rápido di e faktornan di kosta spesífiko di importashon di produkto i servisio ku ta afektando e kosta haltu di bida. E estudio lo duna rekomendashonnan tokante e pasonan ku por tuma pa kombatí e gastunan akí. Otro diskushon a konsentrá riba establese un plan di desaroyo ekonómiko, e proyekto

di energia renobabel, supsidio pa elektrisidat, telekomunikashon i falta di regulashon marítimo.

A tene reunionnan ku Ministerio di Infrastruktura i Maneho di Awa i tambe ku Inspeksion Ambiente di Biba i Transporte, ILT. E reunionnan akí a enfoká riba restriksion di pèmit relashoná ku aterisahe riba pista 30, resultado di e informe di ouditorio di ILT i oportunidatnan di finansiamentu pa renobashon di aeropuerto i programa di kapasitashon.

Ku Ministerio di Finansa, a tuma lugá diskushonnan riba e plan di impuesto 2025 den konsepto, e sistema di Duana kompleho i e funshon general di Duana, unda a duna ehèmpel spesífiko pa ilustrá ku hopi biá e no ta funshoná bon.

Otro reunionnan durante e bishita a enfoká riba temanan mas general, manera pèmit di residensia i trabou, proseso di kontròl di frontera, e próksimo revishon di instalashon di sushi, e resultadonan di

e estudio di awa residual hasi na Saba, pèmit i kumplimentu, e agènda klimatológiko i e próksimo pasonan pa e proyekto Black Rocks Harbor. Tambe a tene reunionnan polítiko ku miembronan di Tweede Kamer di e komishon di relashon di Reino.

En general, Diputado Zagers ta satisfecho ku e resultadonan di e bishita. A tuma medida den diferente área klave i a konkluí akshonnan di monitòr konkreto. “Miéntas ku e mishonnan akí na Hulanda ta yuda aselerá e progreso ku e diferente proyektonan i diskushonnan, nan tambe ta hunga un ròl vital den fortalesemento di relashonnan ku e ministerionan na Den Haag. Kada bishita no solamente ta impulsá nos metanan dilanti, pero tambe ta duna e oportunidat pa mas kolaborashon i un mihó kompromendementu entre nos entidatnan. Esaki ta pone e fundeshi pa un asosashon mas sostenibel i un éksito kompartí.”



SMMC ta yama Gerard Berkel bon biní na Konseho di Supervishon

CAY HILL -- St.Maarten Medical Center (SMMC) ta kontentu di anunsiá e nombramentu di Gerard Berkel na Konseho di Supervishon di e hòspital, for di 1 di febrüari 2024. Berkel ta nativo di Sint Eustatius i ta trese un gran eksperensia den kuido médiko na Konseho di Supervishon, ya ku el a pasa e último 25 añanan aktivamente envolví den kuido médiko primario i sekundario den henter e region i Hulanda.

Berkel tin un bon formashon médiko i un eksperensia amplio den diferente sektor di salú. En partikular, el a sirbi komo direktor di Fundashon di Kuido Médico di Sint Eustatius pa 8 aña i

aktualmente e ta Direktor di e sentro di salú i rekreashon na Sint Eustatius.

Impulsá pa su pashon pa mehorá aksesibilidat i kalidat di kuido médiko, Berkel tin komo meta pa usa su eksperensia pa kontribuí positivamente na desaroyo di SMMC, spesialmente den e situashon krusial akí ku konstrukshon di hospital general di St. Maarten, SMGH.

Berkel ta rekonosé e ròl krusial ku SMMC ta hunga den dunamentu di servisio médiko esensial pa e hendenan di St. Maarten i ta komprondé e impakto indirekto ku e servisionan akí tin riba e islanan mas chikitu, inkluyendo St. Eustatius i Saba. “Mi ta sintí mi honrá di ta

miembro di Konseho di Supervishon di SMMC i mi ta komprometé di kontribuí positivamente pa yuda mi koleganan miembro di e konseho i direktiva pa logra e metanan di SMMC,” Berkel a deklará.

Nos ta yama Berkel bon biní i su gran eksperensia den kuido médiko na Konseho di Supervishon, Dr. Felix Holiday, Direktor Ehekutivo di SMMC, a bisa. “Komo nos ta e hospital general mas serkano pa nos islanan ruman, Saba i Statia, nos meta ta pa inkluí e interesadonan lokal den nos meta di brinda atenshon di kalidat haltu, serka di kas. Den e konteksto akí, Berkel ta sigui e pasonan di un miembro di e konseho nobo, Wayne Johnson,

kende ta bini di Saba,” Dr. Holiday a konkluí.

Konseho di Supervishon ta responsabel pa supervisá e maneho i atministrashon di SMMC, segurando ku e

hòspital ta operá di akuerdo ku leinan na vigor, su estatutonan i e standardnan di atministrashon finansiero, kuido médiko i di pashènt mas haltu.



DEPORTE

Resultado weganan eskolar interinsular

KRALENDIJK

– Durante fin di siman un delegashon di skolnan básiko a partisipá na weganan eskolar interinsular na Aruba.

Den trèfbal, Kolegio Kristu Bon Wardador a hunga kontra Fatima College di Kòrsou pa e di 3 i 4 lugá durante e final. Boneiru a gana 1 sèt, pero desafortunadamente a pèrdè e wega kontra Kòrsou i a terminá na di kuater lugá.

Kolegio Kristu Bon



Wardador a lucha kada sèt ku hopi energia i disiplina i a risibí e título di ekipo mas disipliná pa e kompetensia interinsular eskolar den

trèfbal. Boneiru a keda bon representá pa e damitanan den e kategoria femenino 2011/2012 di dam.

Camila González a

terminá na segundo i Joemi Herrera Delgado, na di tres lugá den e kategoria akí.

E muchanan tambe a logra den e kategoria di mucha 2011/2012. Xi-Qion Frans a keda na di dos lugá i Xinglong Feng, na di tres lugá. Boneiru a keda na di dos lugá entre e islanan.

Den ahedres, Minelly Wu a terminá na promé lugá den kategoria femenino 2013/2014 i Amaris

Djojopawiro na di tres lugá den kategoria 2011/2012. Den kategoria mucha hòMBER 2013/2014, Daniel Fernández Ojeda a keda na di tres lugá. Boneiru a keda na di tres lugá entre e islanan. Tur atleta a disfrutá i gana eksperensia. Nan lo sigui entrená i algun tin e oportunidat pa klasifiká un biámas pae kompetensianan interinsular di 2025.



Azteca 5-2 riba The Untouchables

KRALENDIJK--E tim di biliart di Azteca di Nort Saliña, djamars último den sala di biliart di Kompleho Deportivo Jorge Nicolaas na Kaya Amsterdam, a gana di The Untouchables di Antriòl Pariba ku skor di 5-2 den plei-òf kampionato biliart bola-8 di nos isla.

Azteca – The Untouchables 5-2.

Ch. Vos – D. Zhen 1-2 ku un 7bola.

C. Saragoza - H. Martines 2-0.

J. Josephia - G. Alberto 2-0.

A. Ford – G. Zimmerman 1-2.

J. Jimenez – Y. Zhen 2-0. V. Mercera – H. Duran 2-0 ku un 7bola.

G. Serberie – Ch. Thomas 2-0.

Pa loke ta e resultado di e partido aki, e mesun ekiponan ku tabata den final aña pasá, ta den e gran final tambe di e kampionato aki.

Ku otro palabra, e ekiponan kampion i supkampion di aña pasá, e mesun ekiponan aki ta den e gran final dje aña aki.

Ta trata di e supkampion i kampion aña pasá ku ta den e gran final e aña aki tambe.

Rudy Mercera ku Buchi Pe

KRALENDIJK – E ta Buchi Pe. Ta un nòmber kachó pretu riba e foto aki ku Rudy Mercera en todo



kaso a dun'é. No ta su kachó, sino di un besina di dje na Nort di Saliña, bario na unda e ta biba.

Rudy ta un persona ku hopi amor pa bestia. E foto aki ta saká djárason último, momentu ku Rudy i su ruman muhé Stella a hasi grabashon ku e tim di Herensia, kontando tokante e kasnan bieu den e bario i

nan habitantenan.

“Ami ta yam'é Buchi Pe. Mi no sa kon su nòmber mes ta. Awe mainta m'a habri un bleki di spam dun'é i el a kana mi tras bini na e kas ku nos ta hasi grabashon aki pa e programa spesial aki di Herensia”, Rudy Mercera a bisa. Pa loke ta trata e seri di programa Herensia kanando den Nort

di Saliña, a traha alrededor di 26 programa kaba, di kua algu mas ku mitar a pasa na Bonaire.tv. Rudy Mercera: “Mi mester bisa ku nos ta hañando bon reakshon riba e programanan aki. Nos ta kontentu ku e reakshonnan. Asina nos ke duna un aporte na salvaguardiá herensia kultural-histórico di nos bario i Boneiru en general.”



UNTAMED

HUNTER

POWER UNLEASHED



SERVICE & PARTS
GUARANTEED

+

3 YEAR
WARRANTY

starting
at

\$22,995

CHANGAN AUTO

dabboussi

BEST-SELLING PICKUP

/dabboussimotors

701.6463